

〔日本書紀三十一〕三年正月甲寅朔，天皇朝萬國于前殿。

〔續日本紀一文武〕二年正月壬戌朔，天皇御大極殿受朝，文武百寮及新羅朝貢使拜賀，其儀如常。

〔續日本紀二文武〕大寶元年正月乙亥朔，天皇御大極殿受朝，其儀於正門樹鳥形幟，左日像，青龍，朱雀幡，右月像，玄武，白虎幡，蕃夷使者陳列左右，文物之儀於是備矣。

〔續日本紀三文武〕慶雲元年正月丁亥朔，天皇御大極殿受朝，五位已上坐始設榻焉。三年正月丙子朔，

天皇御大極殿受朝，新羅使金儒吉等在列，朝廷儀衛有異於常。

〔續日本紀五元明〕和銅三年正月壬子朔，天皇御大極殿受朝，隼人蝦夷等亦在列，左將軍正五位上，大伴

宿禰旅人，副將軍從五位下穗積朝臣老，右將軍正五位下佐伯宿禰石湯，副將軍從五位下小野朝臣

馬養等於皇城門外朱雀路東西分頭陳列騎兵，引隼人蝦夷等而進。

〔續日本紀六元明〕靈龜元年正月甲申朔，天皇御大極殿受朝，皇太子略○中拜朝，陸奧出羽蝦夷并南島奄

美夜久，度感，信覺，球美等來朝，各貢方物，其儀朱雀門左右陳列鼓吹騎兵，元會之日用鉦鼓，自是始矣。

〔續日本紀十四聖武〕天平十三年正月癸未朔，天皇始御恭仁宮受朝，宮垣未就，繞以帷帳。十四年正月丁

未朔，百官朝賀，爲大極殿未成，權造四阿殿於此受朝焉，石上榎井兩氏始樹大楯槍。

〔續日本紀二十二淳仁〕天平寶字三年正月戊辰朔，御大極殿受朝，文武百官及高麗蕃客等各依儀拜賀。

〔續日本紀二十九稱德〕神護景雲二年正月丙午朔，御大極殿受朝，舊儀少納言侍立殿上，是日設坐席，餘儀

如常。

〔續日本紀三十五光仁〕寶龜十年正月壬寅朔，天皇御大極殿受朝，渤海國遣獻可大夫司賓少令張仙壽等

朝賀，其儀如常。

〔續日本紀三十八桓武〕延曆四年正月丁酉朔，天皇御大極殿受朝，其儀如常，石上榎井二氏各堅梓楯焉，始

停兵衛叫闐之儀。